

阿毗曇毗婆沙論卷第六十二

二二

迦旃延子造

北涼沙門淳陀跋摩共道秦譯

使捷度十門品第四之九

問曰如猗捨一切地中有何故初禪二禪立
猶不立捨耶第三第四禪立捨不立猗耶答
曰先作是說隨順義是支義若法隨順彼地
者立支猗隨順初禪第二禪故立支捨隨順
第三第四禪故立支復次勢用勝故更相覆
敵如初禪第二禪猗勢用勝覆敵於捨第三

第四禪捨勢用勝故覆蔽於猗問曰云何此
二法更相覆蔽答曰以所行相違故如一人
一時亦行亦住亦眠亦寤一向相違彼亦如
是復次對治欲界五識及麤身故初禪立猗
爲支對治初禪三識及麤身故第二禪立猗
爲支第二禪無麤身故第三禪不立猗爲支
第三禪無麤身故第四禪不立猗爲支復次
以初禪二禪有染汚喜以是事故佛作是說
應猗不應捨是故初禪二禪立猗爲支第三
第四禪無染汚喜是故諸聖行捨復次以初

禪二禪猗生有所緣如說若心喜時身則生
猗第三第四禪猗生無所緣是故諸聖行捨
問曰內信一切地盡有何故第二禪地立支
非初禪耶答曰先作是說隨順義是支若法
隨順彼地者立支內信隨順第二禪地故立
支復次初禪覺觀如火識身如汚泥令心擾
濁信不明淨如熱濁泥中面像不現第二禪
無覺觀火識身汚泥信則明淨如清冷水面
像則現彼亦如是復次行者住第二禪於界
離欲於地離欲生大信心行者離不定欲界

欲起初禪現在前作如是念我已得離不定
界欲不知定界欲為可離不後離初禪欲起
二禪現在前是時於界離欲於地離欲生大
信心如初禪地欲可離當知一切地乃至非
想非非想處欲盡可離以是事故二禪信立
支初禪不立問曰念慧一切地中有何故第
三禪地立支非餘地耶答曰先作是說隨順
義是支若法隨順彼地者立支念慧隨順第
三禪故立支復次第三禪道多諸留難自地
亦有留難他地亦有留難他地道多諸留難

者第二禪喜漂沒輕躁猶如羅刹令行者離第三禪欲時生諸衰退爲對是事故第三禪立念爲支是故佛作是說汝等當正念莫爲第二禪喜之所漂沒自地留難者第三禪樂受是一切生死中最勝樂令行者樂著不能離上地欲爲如是事故第三禪慧立支是故佛作是說汝等應於是樂莫生貪著不求上地離欲法問曰念慧一切地中有何故第四禪地立念爲支不立慧答曰先作是說隨順義是支若法隨順彼地者立支念隨順第四

禪故立支慧不隨順故不立支復次第四禪道多諸留難他地有留難自地道無留難者第三禪地樂受於一切生死中最勝行者貪著故不求離上地欲是故佛作是說汝等應當正念莫爲第三禪地樂之所覆沒以自地無留難故不立慧爲支復次第四禪地立不苦不樂受爲支不苦不樂受是無明分慧是明分無明是相違法故問曰若是禪支亦是助道分耶答曰或是禪支非助道分乃至廣作四句是禪支非助道分者初禪觀第三

禪樂第四禪不苦不樂是也是助道分非禪支者精進正語正業正命是也是禪支亦是助道分者諸餘助道分是也非禪支非助道分者除上爾所事問曰初禪觀第三禪樂第四禪不苦不樂何故不立助道分耶答曰以覆蔽故初禪地觀爲覺所覆蔽故不立助道分第三禪地樂爲猗樂所覆蔽故不立助道分第四禪地不苦不樂爲行捨所覆蔽故不立助道分以如是事故不立助道分問曰精進何故不立禪支答曰禪支於自地勝精進

於他地勝初禪地精進作第二禪地方便勝乃至無所有處精進作非想非非想處方便勝復次精進與生定法相妨與何生定法相妨答曰樂如說樂故定心生衆生行精進者必苦問曰何故正語正業正命不立禪支耶答曰禪支是相應是有緣是有行是有依是有勢用正語正業正命與此相違故不立禪支問曰若是禪支亦是念處耶若是念處亦是禪支耶若是禪支亦是正斷神足根力覺道分耶若是正斷神足根力覺道分亦是禪

支耶應隨相廣說復作是問若是初禪支亦是助道分耶若是助道分亦是初禪支耶乃至第四禪問亦如是應隨相廣說復作是問若是初禪支亦是念處正斷神足根力覺道分耶若是念處乃至八道分亦是初禪支耶乃至第四禪問亦如是應隨相廣說問曰諸邊及無色定爲立支不若立者此中何故不說若不立者施設經云何通如說頗有空處定於空處定道勝根勝定勝支等耶答曰有從空處定起次第還入空處定答曰或有說

者說邊及無色定立支施設經所說善通此中何故不說答曰應說如初禪有五支邊亦有五支除喜增不苦不樂受如根本第二禪有四支邊亦有四支除喜增不苦不樂受如根本第三禪有五支邊亦有五支除喜增不苦不樂受如根本第四禪有四支邊亦有四支如第四禪四無色定亦應爾評曰諸邊及無色定不立支是故此中不說問曰施設經所說云何通答曰此中說根勝道勝定勝者以後定用前定爲因生故支等者說覺道支

問曰何故初禪第三禪立五支第二第四禪立四支耶答曰先作是說隨順義是支若法隨順彼地者立支五支隨順初禪第三禪故立五支四支隨順第二第四禪故立四支復次欲界是難斷難除難過之界必須牢強對治是故彼對治初禪立五支第二禪喜難斷難除難過故必須牢強對治是故彼對治第三禪立五支初禪不難斷難除難過故不須牢強對治是故彼對治第二禪立四支復次爲對欲界五種境界愛故初禪立五支爲對

二禪五種喜愛故第三禪立五支初禪無五種境界愛故第二禪不立五支第三禪無五種喜愛故第四禪不立五支復次欲令行者入超越定得隨順故起五支定入五支定起四支定入四支定問曰如起第三禪入空處定若是四支或是無支此中云何得隨順耶答曰一切外法內法所作初須隨順後事成時則不須隨順外法所作者曾聞有王名旃陀掘臣名遮那伽於十二年造出金法始成一麥粒許便作師子吼我今力能造作金

山內法所作者如行者修神足時初能舉身離地如半胡麻轉如胡麻半麥一麥半指一指半寸一寸半尺一尺半肘一肘半尋一尋衣鉤衣枷後若成時舉身至阿迦貳吒天如是外法內法事未成時必須隨順事已成後不須隨順彼超越定亦爾事未成時起五支定入五支定起四支定入四支定事已成後起五支定入四支定若無支定

佛經說有四種勝心數法定受現法樂問曰何故名四種勝心數法定答曰彼定有大勢

力能成大事有大功用是根本禪是故根本四禪名勝心數法定復次彼定中多諸心數法可得故如無量解脫勝處一切處無礙無諍願智半多俱置等是故名勝心數法定復次行者於彼定得多種心受樂如無量解脫乃至空空三昧無相無相三昧無願無願三昧是故名勝心數法定受現法樂者問曰此

法亦受後法樂不但現法樂何故說言受現法樂不說受後法樂耶答曰應說如說受現法樂亦應說受後法樂而不說者當知此說

有餘復次若說現法樂當知已說後法樂所以者何後法樂必因現法樂故如說先於此修定後生彼處復次現法樂能令後法樂相續非後法樂能令現法樂相續是故說現法樂復次現法樂是後法樂方便所依門復次現法樂是一切所信處如愚智內道外道皆信現法樂後法樂或有信者或有不信者不信後法樂者如外道復次諸凡小貪著少欲樂不求離欲佛作是說汝等若欲得廣大樂者當斷欲愛起根本禪現在前當受廣大之

樂復次現法樂一切盡受後法樂有受者有不受者以如是等事故佛說禪是現法樂非後法樂佛經說諸比丘有四種天道能令衆生不淨者淨淨者轉更明勝問曰云何立天道爲以得正決定爲以盡漏耶若以得正決定立天道者則應有六所以者何依六地得正決定故六地者未至中間根本四禪若以盡漏者則應有九所以者何行者依九地得盡漏故九地者謂未至中間四禪三無色定答曰應作是說亦以得正決定亦以盡漏故

立天道是說則遮無色定問曰若然者天道應有六尊者波奢說曰此中說禪及眷屬故有四無六尊者瞿沙作是說此中說清淨天名天天有三種一假名天二生天三清淨天假名天者謂人王等生天者從四天王天乃至非想非非想處天清淨天者謂阿羅漢此中說清淨天名天得二種道謂見道修道忍道智道法智道比智道能令身心清淨者復次於生天道生怖畏想欲令安住實義天道故佛說此經有四種天道生天者謂三十三

天是也彼有四種園林一名質多羅毗二名頤留沙三名彌尸迦婆那四名難陀那彼園林中有四種道種種嫁女所遊行處作諸音樂燒衆名香安置種種餚饍飲食隨意生形鳥出種種音能令諸天遊戲園林受於快樂諸聖亦示滅盡涅槃爲園林四禪爲道種種道品善法而嚴飾之令諸賢聖受種種快樂入於涅槃云何四種天道如比丘離欲惡不善法乃至廣說問曰盡離欲界法何故佛但說離欲惡不善法耶答曰如佛說離欲惡不

善法當知已說盡離欲界法復次此法體應
斷斷已則不成就與聖道相妨有漏善法不
隱沒無記法不與聖道相妨欲惡不善法與
聖道相妨若斷欲惡不善法當知有漏善法
不隱沒無記法亦斷所以者何同一對治斷
故譬如燈不與炷油器相妨而與闇相妨若
破闇時亦燋炷盡油令器熱復次以此法難
斷難除難過故復次以此法是重惡多諸過
患故復次此法離欲愛時多作留難令離欲
法不得相續如守門人不令他人入彼亦如

是復次行者爲對除此法故修初禪定道復
次行者以憎惡此法故盡離欲界復次此法
上地所無所不行故以如是等事故佛說離
欲惡不善法問曰此中何者是欲何者是惡
不善法答曰資生欲是欲煩惱欲是惡不善
法復次欲是五欲惡不善法是五蓋復次欲
是欲愛使惡不善法是餘煩惱復次欲是欲
覺惡不善法是恚覺害覺復次欲是欲界惡
不善法是恚界害界復次欲是欲想惡不善
法是恚想害想有覺有觀者與覺俱故名有

覺與觀俱故名有觀離生者問曰如上地離清淨妙好何故但說初禪離不說上地離答曰說始以顯終故世尊或說始以明終或說終以明始說始以明終者如此中說說終以明始者如說何處受身不自害命不害他命佛告舍利弗非想非非想處天受身不自害命亦不害他命如始終初入已度方便畢竟亦如是復次以此離初入初得故復次初禪離從離生從初禪定心生如因陸生故名陸生因水生故名水生彼亦如是因離生故名

離生復次初禪離爲二種無漏所守護二種者謂未至中間復次初禪離是上地離方便所依門復次初禪離能生養增廣上地離復次初禪離是上地離因根本有集緣生起處復次初禪離對非離法故欲界非離法誰是近對治謂初禪離是復次欲令疑者得決定故如欲界有覺觀有識身有尊卑有眷屬初禪亦爾或謂欲界有如是過故非離欲初禪亦有如是過故非離欲令此疑得決定故說初禪有離復次欲令行者心歡喜故行者離

欲惡不善法起初禪離生大歡喜勝於後時
起上地離猶如飢人初得蔬食勝於後時得
好美食復次以初禪能起諸離現在前復次
以依初禪能令三種行人入正決定得果離
欲盡漏三種行人者謂具縛離欲漸離欲人
復次以依初禪故令三種信解脫轉根作見
到三種信解脫者謂次第漸離欲離欲人復
次以初禪離能對治三界復次以初禪有得
四沙門果道有九斷智果道有七覺支八道
支是三十七助道法有七種修道有苦根憂

根無慚無愧男根女根婬欲搏食愛五蓋五
欲對治法復次以初禪是五陰十二十八
界對治法以如是等事故佛經說初禪是離
喜樂者喜是喜根樂是猗樂復次喜是受陰
攝樂是行陰攝入初禪者若得成就初禪善
五陰是名入初禪已滅覺觀乃至廣說問曰
如離初禪欲盡滅初禪法何故佛但說滅覺
觀耶答曰如佛說滅覺觀當知已說滅初禪
法復次以覺觀難斷難除難過故復次以此
法是重多諸過患復次此法離初禪愛多作

留難令離欲法不相續如守門人不令他入彼亦如是復次行者爲對治此法故修二禪定道復次行者憎惡此法故盡離初禪復次此法上地所無不行故以如是等事故佛說滅於覺觀生內信者內是心信是信根心信此法故名內信尊者和須蜜說曰覺觀擾亂定心覺觀若滅心則清淨故名內淨如水不波浪時名爲澄清彼亦如是染汚喜今定心濁彼若滅心則清淨譬如濁水澄清則名爲淨尊者達摩多羅說曰行者入第二禪時於

彼禪心則寬博信樂堪忍久住樂觀彼法心不移動住於一處有是處所有是體性我得第二禪心住一處者心唯行一門中故欲界心行於六門初禪心行於四門第二禪心行於一門故言心住一處無覺無觀者覺觀已滅故定生者問曰如初禪亦有定何故第二禪說定初禪不說耶答曰以二禪定明淨勝妙勝初禪定復次二禪中定從定生定所長養定後現在前定者謂初禪初禪定是初定從不定心後現在前不定心者謂欲界心復

次初禪有定不定心有內向心有外向心或
緣外法或緣內法第二禪惟定惟內向心惟
緣內法復次以第二禪滅聲根本聲根本者
是覺觀如說有覺觀者能出語聲非無覺觀
第二禪中無有是事復次第二禪說是賢聖
默然法如佛告目捷連汝莫輕懷第二禪此
是賢聖默然法以如是事故說二禪定不說
初禪喜樂者喜是喜根樂是猗樂復次喜是
受陰攝樂是行陰攝入第二禪者若得成就
第二禪善五陰名入第二禪離喜住捨乃至

廣說問曰如離二禪欲時盡離第二禪法何
故世尊獨說離喜答曰如佛說離喜當知已
說離二禪法復次以喜難斷難除難過故復
次以喜是重多諸過患故復次此法離二禪
愛時多作留難令離欲法不相續如守門人
不令他入彼亦如是復次行者爲對治此法
故修三禪定道復次行者憎惡此法故盡離
二禪復次此法上地所無不行故以如是等
事故佛說離喜住捨有念慧身受樂者身者
是意身復次若說意受樂令四大身亦受樂

是賢聖所說應捨者所說爲他應捨者是自
身問曰如一切地盡是賢聖所說應捨何故
佛獨說第三禪應捨答曰以第三禪道多諸
留難有自地留難亦有他地留難他地道留
難者第二禪喜漂沒輕躁猶如羅刹今行者
於離二禪欲法而便衰退自地道留難者第
三禪地有一切生死中最勝樂行者生貪著
故不求上地離欲法是故說道者爲初行人
說留難處第三禪道多諸留難謂第二禪喜
漂沒等應修正念離第二禪欲時莫爲喜所漂

沒自地留難者謂一切生死中最勝樂汝等
應以正慧除去貪著應求上地離欲法譬如
商人爲諸新學商人不知方土過患者說留
難事此城中多諸姪女聚博飲酒欺誑之處
汝等應遠離之勿令他欺劫奪財物永盡彼
亦如是住念樂入第三禪者若得成就第三
禪善五陰是名入第三禪斷樂乃至廣說問
曰離第三禪欲時盡斷第三禪諸法何故唯
說斷樂答曰如佛說斷樂當知已說斷第三
禪法復次以樂難斷難除難過故復次以樂

是重多諸過患故復次此樂離第三禪愛時
多作留難令離欲法不相續如守門人不令
他入彼亦如是復次行者爲對治此法故修
第四禪定道復次行者憎惡此法故盡離第
三禪復次此法上地所無不行故以如是等
事故佛說斷樂斷苦者問曰離欲界欲時行
者已斷苦根何故離三禪欲時言斷苦耶答
曰此中說已斷名斷說遠名近如已來名來
如說大王從何處來彼已來不名來此中說
已來名來餘廣說如上此亦如是已斷名斷

遠名爲近復次此中說雙法畢竟斷故苦樂
是雙離欲愛時雖斷苦樂而樂不畢竟斷離
第三禪欲畢竟斷樂復次斷樂者是第三禪
樂斷苦者是彼相應心心數法復次斷樂者
是第三禪斷苦者是第三禪出入息賢聖以
出入息作苦想甚於凡夫受阿毗地獄苦復
次斷樂者是第三禪樂斷苦者亦是樂根如
說無常故苦先滅憂喜者離欲愛時滅憂根
離二禪欲時滅喜根故說先滅憂喜不苦不
樂者說不苦不樂受捨者說行捨淨念者問

曰下地無漏念亦是淨何故說第四禪念是淨耶答曰第四禪念以無八事故名淨謂無苦無樂憂喜覺觀出入息復次彼念無內外留難故下三禪中有內外留難初禪內留難者有如火覺觀外留難者爲火所燒第二禪內留難者有如水喜外留難者爲水所漂第三禪內留難者有如風出入息外留難者爲風所散第四禪無內外留難復次以第四禪念不忘失故三禪爲災所及念有忘失第四禪念不爲災所及故無有忘失復次無煩惱

及患故或有念無煩惱有患有念無患有煩惱有念無煩惱無患有念有煩惱有患無煩惱有患者三禪中無漏念無患有煩惱者第
四禪中有漏念無煩惱無患者第四禪無漏念有患有煩惱者三禪中有漏念及欲界念復次以依所依清淨故第四禪所依身明淨猶如燈光如所依明淨故彼念亦明淨復次第四禪是滿足依諸依中最勝地是到彼岸法復次第四禪是中依猶如齊上有三地無漏下有三地無漏復次第四禪是偏依不動

定復次以第四禪有二事廣一處所廣二善根廣復次第四禪處恒河沙諸菩薩等得正決定成阿耨多羅三藐三菩提一切菩薩盡依第四禪得正決定成阿耨多羅三藐三菩提復次以三種行人盡依第四禪入正決定得果盡漏三種行人者謂佛辟支佛聲聞復次以第四禪四大最勝形色最勝故復次以第四禪中念前世智從欲界至第四禪盡能緣以如是等事故佛說第四禪念名淨入第四禪者若得成就第四禪善五陰是名入第

四禪佛經說憂根以初禪滅苦根以第二禪滅問曰二根俱離欲時滅佛何故說憂根以初禪滅苦根以第二禪滅耶答曰佛說過對治法離欲界欲時雖斷苦彼對治不名過若離對治初禪欲時彼對治名過誰是彼對治答曰初禪是復次此中說性過離欲愛時雖斷苦根不過其性誰是其性答曰識身是復次此中說過所依離欲愛時雖斷苦根不過所依離初禪欲時過其所依誰是所依答曰識身是復次此中說覺觀是苦賢聖於覺觀

作苦想甚於衆生受地獄苦

佛經說均陀當知此勝四心數法定受現法
樂行禪比丘應知入知起均陀當知此四無
色寂靜解脫行禪比丘應當爲他解說問曰
何故說禪言知說無色言應當爲他解說耶
答曰以禪是麤現見了了法行禪者從禪起
復欲入禪佛作是說若欲入者隨意復入無
色定微細不現見不了了行禪者從無色定
起不欲復入佛作是說若不欲復入者出定
入定之法應爲他人而解說之莫忘失此法

復次禪有種種不相似法故行禪者從禪出
已復還欲入佛作是說若欲入者隨意而入
無色定無有種種不相似法行禪者出已不
欲復入是故佛作是說若不欲入者出定入
定之法應爲他人解說莫忘失此法復次禪

中有多諸功德善利故行禪者出已復還欲
入是故佛作是說若欲入者隨意而入無色
定無多功德善利行禪者從彼定出不欲復
入是故佛作是說若不欲入者應當爲他人
解說莫忘失此法復次禪偏照法能緣自地

亦緣上下地行禪者出已偏還欲入佛作是說若欲入者隨意而入無色定非偏照法能緣自地亦緣上地不能緣下地行禪者從彼定起已不欲復入是故佛作是說若不欲入者應爲他人而解說之莫忘失此法

佛經說四禪有四善利四無色定有一善利問曰佛何故說四禪有四善利說四無色有一善利耶答曰先所說諸答此中應廣說更有二不同答一以禪有三種謂有覺有觀無覺有觀無覺無觀故有四善利無色定唯無

覺無觀故有一善利二以禪有種種根謂喜根樂根捨根故有四善利無色定無種種根惟一捨根故有一善利問曰禪善利有何差別答曰名即差別是名爲禪是名善利復次禪三種善染污不隱沒無記善利唯善復次禪有漏無漏善利唯無漏復次禪是色界繫不繫善利唯不繫復次禪是學無學非學非無學善利唯學無學復次禪是見道斷修道斷無斷善利唯無斷禪善利是謂差別佛經說四禪是牀座問曰何故佛說四禪是牀座

答曰以是高攝故高者高於欲界攝者攝諸
善法復次爲諸聖人疲厭生死道示其坐處
故道行疲厭坐於牀座則得休息如是諸
聖疲厭生死道坐於四禪牀座則得休息

阿毗曇毗婆沙論卷第六十二

音釋

寤五故切躁則到切不掘其月
寐覺也安靜也肘陟抑𢵤
音他餚餚胡肴切凡非穀而食
餚時戰切具食也搏度官切
莫結切泥聚也

永樂北藏

阿毗曇毗婆沙論

第一二二冊